
ՀԱՅԵՐԵՆԻ ՆՈՒՅՆԱԲԱՂԱԴՐԻՉ ՓՈԽԱՏԵՂՈՒՅԹՆԵՐԻ
ՀՆՉՅՈՒՆԱԿԱԶՄԱԿԱՆ ՔՆՆՈՒԹՅՈՒՆ

ՍՈՒՍԱՆՆԱ ԳԵՎՈՐԳՅԱՆ

Ինպես հայտնի է, փոխատեղություններն առաջ են գալիս բառերի բաղադրիչներին՝ արմատների ու ածանցների հետևառաջությունից: Նշված դրափոխությունները կարող է հանգեցնել թե՛ հնչյունական, թե՛ իմաստային փոփոխությունների: Մեր խնդիրն է քննել նույնաբաղադրիչ փոխատեղությային բառազույգերի հնչյունական կազմը, հնարավոր հնչյունական տարբերություններն ու ընդհանրությունները:

Նույնաբաղադրիչ փոխատեղությունների հնչյունական կազմի քննությունը ցույց է տալիս, որ բառազույգերում անդամները լինում են երկու կարգի՝ տարահնչյուն կամ նույնահնչյուն: Առաջին դեպքում բառերը հիմնականում միևնույն հնչյուններից են բաղկացած, բայց կան նաև որոշակի տարբերություններ: Երկրորդ դեպքում բառերը բացառապես նույն հնչյուններն ունեն: Կանգ առնենք նշված տեսակների վրա առանձին-առանձին և ցույց տանք տարահնչյունության և նույնահնչյունության առաջացման պատճառները և տարբերիչ գծերը:

1. ՏԱՐԱՀՆՉՅՈՒՆ ՆՈՒՅՆԱԲԱՂԱԴՐԻՉ ՓՈԽԱՏԵՂՈՒՅԹՆԵՐ

Հնչյունակազմական տարբերությունների առաջացման պատճառները մի քանիսն են:

1. Հնչյունափոխություն: Բառազույգի անդամներից մեկում բարդության հնչյունափոխման ենթակա բաղադրիչը բառավերջում է, շեշտակիք է, հետևապես փոփոխված չէ: Բայց նույն այս բաղադրիչը երկրորդ անդամում դրափոխության հետևանքով հայտնվում է բառասկզբում, կորցնում է շեշտը և հնչյունափոխվում է: Ասվածը նախ ցույց տանք ձայնավորների փոփոխման օրինակներով: Գեղաժպիտ – ժպտագեղ, գեղանկարիչ – նկարչագեղ, կանաչադեղին – դեղնականաչ, լանջահովիտ – հովտալանջ գույգերում առաջին անդամների ի հնչյունը երկրորդ անդամներում սղվել է և պատճառ դարձել դրանց հնչյունակազմական տարբերության: Մնացած հնչյունները անդամներում նույնն են: Խոհավիտ – մտախոհ, տերնախիտ – խտատերև, ճակատապինդ – պնդաճակատ, քարախիճ – խճաքար գույգերում ի-ն երկրորդ անդամներում հնչյունափոխվել է ը-ի՝ առաջ բերելով հնչյունական մեկ այլ տարբերություն: Հետևյալ խմբում բառավերջի բաղադրիչներում է ձայնավորը բառասկզբ գալով դառնում է ի. փորձագետ – գիտափորձ, խաղասեր – սիրախաղ, պարահանդես –

հանդիսապար, փայտաշեն – շինափայտ, դրամանվեր – նվիրադրամ: Այդ ձայնավորներն էլ խախտում են անդամների հնչյունակազմական նույնությունը:

Նախապես ու ձայնավորով բաղադրիչը, բառավերջից բառասկիզբ գալուց հետո, ունենում է գաղտնավանկ ը, ուստի գայլաշուն, գեղանուրբ, խաղաթուղթ, պարախուճ, նավակամուրջ անդամների զույգերում հնչում է՝ շնագայլ, նրբագեղ, թղթախաղ, խմբապար, կամրջանավ:

Ը ձայնավորի հնչյունակազմական տարբերիչ լինելը տեղի է ունենում երկու ճանապարհով: Նախ՝ այն հնչում է բառազույգերում անդամներից մեկի գաղտնավանկում, իսկ մյուսում չի հնչում: Բայց այս մասին փոքր-ինչ հետո (3-րդ կետ): Այժմ ավելի լսելի հնչողության մասին: Վերջինս լինում է այնպիսի բառազույգերում, որոնցում երկրորդ անդամները վերլուծական բարդություններ են՝ կայուն բառակապակցությունների տեսքով և որոնց փոխարեն, բաղադրիչների հետևառաջությունից հետո, առաջին անդամներում համադրական բարդություններ են: Այդ բառակապակցությունների առաջին բաղադրիչներն ընդունում են որոշյալ ը հոդը. գիրկը բաց, գլուխը կախ, սիրտը լայն, գլուխը տաք, ճակատը բաց: Քանի որ նույն այս բաղադրիչներն երկրորդ անդամներում բառավերջում են և, բնականաբար, հոդի հարկը չկա, ուստի հնչյունակազմերն էլ փոքր-ինչ այլ են՝ բացգիրկ, կախգլուխ, լայնսիրտ, տաքգլուխ, բացճակատ: Հմմտ. նաև. բերանը բաց (գարնացած), սիրտը բաց, սիրտը կախ, բերանը փակ (գաղտնապահ), երեսը պարզ և բացբերան, բացսիրտ, կախսիրտ, փակբերան, պարզերես:

Այժմ անցնենք բառակազմական տարբերիչ նշանակություն ունեցող բաղաձայններին: Որպես այդպիսիք հանդես են գալիս յ, ն, վ հնչյունները: Յ բաղաձայնի դեպքում համեմատաբար փոքր դեր է խաղում նրա ձայնակապ լինելու հանգամանքը: Ոչ մեծ թվով բառազույգերի առաջին անդամներում բարդության մեջ երկրորդ դիրքում լինում են և կամ օ ձայնավորներով ավարտվող բաղադրիչներ: Վերջիններս, երկրորդ անդամներում առաջին դիրքում լինելով, բառաբարդման պահանջով հանդիպում են և հոդակապին. երևան է գալիս յ ձայնակապը, որը չկար առաջին անդամում: Այս կերպ հնչյունակազմորեն միմյանցից տարբերվում են սիրարքա (սիրտ արքա) «Սիրարքա դերվիչ եմ՝ վերքով անբալգամ՝ ...մազերիդ կարոտ»¹ – արքայասեր, գեղահմա - հմապգեղ, կամահաճո – հաճոյակամ, մտահաճո – հաճոյամիտ, սիրահաճո – հաճոյասեր, կցաշղթա – շղթայակից բառազույգերի անդամները: Շատ ավելի մեծ է յ բաղաձայնի դերը երկհնչյունների կազմում, որոնց կանդրադառնանք ստորև:

Ն բաղաձայնը, որպես անդամների տարբերիչ հնչյուն, ձայնավորների համեմատությամբ ունենում է դիրքային հակառակ առանձնահատկություն: Եթե ի, է, ու ձայնավորները հնչյունափոխվում են բառասկզբում և հանդես են գալիս բառավերջում, ապա այժմ հակառակն է: Ն հնչյունը պահպանվում է բառասկզբում և բառավերջի բաղադրիչում հանդես չի գալիս, քանի որ պատմական հնչյունափոխությունից հետո այն արմատում վերականգնվում է բառաբարդման հետևանքով: Այս կերպ, առատակաթ – կաթնատատ, բառասկիզբ - սկզբնաբառ, ձիաբեռ - բեռնաձի, կցամաս – մասնակից կարգի բառազույգերի երկրորդ ան-

¹ Հ. Շ ի ը ա գ. Քնար Հայաստանի, 1964, էջ 155:

դամներում ունենում ենք ն տարբերիչը: Հմմտ. նան. առատախոստում – խոստումնատատ, զարդասեղ – ասեղնազարդ, խաղասկիզբ– սկզբնախաղ, բացդուռ – դռնբաց:

Վ բաղաձայնի մասին խոսելիս դարձյալ պետք է հիշել ու ձայնավորի հնչյունափոխությունը՝ այս անգամ անուն բառում և բաց վանկում, որտեղ այն փոխարկվում է վ-ի առաջին դիրքի արմատում՝ վերջին դիրքում մնալով ու, ինչպես. տառանուն – անվանատառ, կնքանուն – անվանակնիք, փոխանունություն– անվանափոխություն, կցանուն – անվանակից, կոչանուն – անվանակոչ, ապա նան. եզրառու – առվեզր, կաթնաթթու – թթվակաթ, կաղամբաթթու – թթվակաղամբ, քաղցրաթթու – թթվաքաղցր:

Հնչյունափոխվող երկհնչյուններից անհամեմատ մեծ թվով նույնաբաղադրիչ փոխաստեղծություններում հանդես է գալիս ույ երկհնչյունը: Երբեմն այն սղվում է բառագույզի անդամներից մեկում, մնում մյուսում՝ որպես տարբերիչ. գորշակապույտ – կապտագորշ, կարմրակապույտ – կապտակարմիր, հողմապսույտ – պտտահողմ, շթասառույց – սառցաշիթ: Ավելի հաճախ հանդիպում է ու ձայնավորի փոխարկվելու դեպքը, երբ ընկնում է յ բաղաձայնը: Վերջինս, անդամներից մեկում պահպանվելով, դառնում է հնչյունակազմի տարբերիչ. խոտաբույժ – բուժախոտ, խաղագույզ – գուգախաղ, հորդալույս–լուսահորդ, խռովահույզ – հուգախռով, պայծառագույն – գունապայծառ:

Սակավաթիվ են նույնաբաղադրիչ փոխաստեղծությունների այն զույգերը, որոնցում կան յա երկհնչյունը և դրա փոխարկումը է ձայնավորի: Դրանցից են. զարդաժանդակ – ժանեկազարդ, զարդապատյան – պատենազարդ, գրամատյան – մատենագիր և էլի մի քանիսը:

Յու երկհնչյունի հնչյունափոխության հետ կապված կան զուգաձևություններ: Բայց նախ հարկ է նշել, որ բառերի մեծագույն մասում այն մնում է անփոփոխ թե՛ բառասկզբի, թե՛ բառավերջի բաղադրիչներում: Սակայն այդուր, արյուն, ձյուն արմատները բառասկզբի դիրքում հանդես են գալիս նան հնչյունափոխված տարբերակներով, երբ յու-ն սղվում է: Մյուս անդամում՝ բառավերջում պահպանվելով, ի հայտ է գալիս հնչյունակազմական տարբերություն: Այդպես է խառնալուր – ալրախառն, պատալուր – ալրապատ, լիարյուն – արնալի, խառնալուր – արնախառն, առատաձյուն – ձնատատ և փոխաստեղծական այլ զույգերում: Բայց նշված արմատներն ունեն յու-ն պահպանած իրենց բառային տարբերակները. ուրեմն՝ վերը բերված զույգերը կարող են կազմվել մեկ այլ կերպ ևս. ալրախառն– խառնալուր, ալրապատ– պատալուր, լիարյուն– արյունալի, արյունախառն– խառնալուր, առատաձյուն– ձյունատատ: Բոլոր այն դեպքերում, երբ յու երկհնչյունը առկա է երկու անդամներում էլ, դրանց տարահնչյուն լինելու համար պետք են այլ պատճառներ: Այդպիսիք չլինելու դեպքում անդամները դառնում են նույնահնչյուն:

2. Ա հոդակապ: Այստեղ տարահնչյունության է հանգեցնում հայերենի բառակազմության հայտնի օրենքներից մեկը: Այն է. որոշ բառեր բառաբարդվում են և հոդակապի միջոցով, ուրիշները՝ առանց դրա: Այս կերպ գոյություն ունեն նան բառային տարբերակներ: Նշված երկու կարգի բառերը կարող են կազմել փոխաստեղծությամբ զույգեր, որոնցում անդամների հնչյունների քանակը տար-

բերվում է՝ ի դեմս ա հողակապի՝ կազմում մեկ լրացուցիչ ա լինելով կամ չլինելով: Հեշտ է նկատել, որ սրտաբացություն-բացսրտություն, յուրաքար-քարյուղ, սայրասուր-սուրսայր, հանքաքար-քարհանք, աղաքար-քարաղ փոխատեղություններում երկրորդ անդամները մեկ հնչյուն պակաս ունեն՝ բարդված լինելով առանց հողակապի: Նկատելի է նաև, որ եթե չհաշվենք շեղումները (օրինակ՝ ամենա բաղադրիչով բարդությունները), ա հողակապ որպես կանոն չեն ընդունում ձայնավորով սկսվող բառերը, երբ բարդվելիս լինում են վերջին դիրքում: Դրանց բառասկզբի ձայնավոր հնչյունը, հայտնվելով բառամիջում, բաղադրիչները կապակցող նշանակություն է ձեռք բերում: Միա օրինակները ը, ի, ու, օ ձայնավորներով սկսվող արմատների, որոնք մտնում են փոխատեղական բառաբարդությունների մեջ. ընթացակից-կիցընթաց, ընկերախաղ-խաղընկեր, ընտրաճառ-ճառընտիր, իմացաբանություն-բանիմացություն, իմաստախորհորիմաստ, իրանագեղ-գեղիրան, ուժաբան-բանուժ, ունայնաձեռնություն-ձեռնունայնություն, ուրախասիրտ-սրտուրախ, օժիտադրամ-դրամօժիտ, օջախասալ-սալօջախ, օրորաքայլ-քայլօրոր: Է ձայնավորին կանդրադառնանք հաջորդ ենթակետում: Սակայն անհամեմատ մեծ է թիվը հողակապով կամ առանց հողակապի փոխատեղական գույզեր կազմող այն բառերի, որոնք սկսվում են ա ձայնավորով. շատ ավելին, քան մյուս հինգ ձայնավորներով սկսվողները՝ միասին վերցրած՝ մոտ 300 բառ: Այդպիսիք են. արձակահեր-հերարձակ, ատամնաշրթնային-շրթնատամնային, արժանապատվորեն-պատվարժանորեն, ածիափայտ-փայտածուխ, աչագեղ-գեղաչ: Այսպիսիների մեջ էլ զգալի թիվ են կազմում առատ արմատով բաղադրվածները՝ մոտ 80 բառ: Ինչպես. առատաձեռնություն-ձեռնառատություն, առատախորդ-խորդառատ, առատաբերք-բերքառատ, առատաշնորհ-շնորհառատ, առատաորս-որսառատ:

Կա ա հողակապի հետ կապված տարահնչյուն փոխատեղությային անդամներ կազմելու մեկ այլ դեպք ևս: Բառերից մեկը կազմվում է ա հողակապով, իսկ մյուսը՝ Է. վերջինս առաջանում է ի և ա ձայնավորների հաջորդականությունից: Այդպիսի բառագույգերում զգալի է բաժին բառով բարդվածները: Բերենք համապատասխան օրինակներ. պնդագոտի-գոտեպինդ, դեղափոշի-փոշեդեղ, լուսահոգի-հոգելույս, խնդամոլի-մոլեխինդ, փնջածաղիկ-ծաղկեփունջ, սխալահաշիվ-հաշվեսխալ, և այլա. մասնաբաժին-բաժնեմաս, կիտաբաժին-բաժնեկես, հողաբաժին-բաժնեհող, չափաբաժին-բաժնեչափ և այլն: Ըստ որում, հողակապ հանդիսացող է ձայնավորը կարող է լինել անդամներից միայն մեկում և բերել հնչյունական տարբերություն, երբ մյուս անդամը բարդվում է առանց հողակապի: Ինչպես. ուղեգորգ-գորգուղի, ոսկեգարդ-գարդոսկի, ուղեկապ-կապուղի, օղեթուրմ-թրմօղի:

Վերջապես, ոչ մեծ թվով փոխատեղությային գույգերում էլ անդամներից մեկում հանդես է գալիս ա հողակապը, իսկ մյուսում՝ արմատներն իրար կապակցելու նշանակություն ձեռք բերած ի նախդիրը՝ կորագլուխ-գլխկոր, մահամերձ-մերձիմահ:

3. Արտասանական զանազանություն: Փոխատեղությունների այս պատճառը որոշակի բառերում կապված է յե երկհնչյունի, ուրիշներում վօ հնչյունակապակ-

ցության և երրորդներում էլ ը ձայնավորի հետ: Որոշիչն այն է, թե բաղադրիչները ո՞ր դիրքում են, ինչը և առաջ է բերում արտասանական փոփոխություններ:

Երգասիրություն-սիրերգություն, եզրապատ-պատեզր, եղեգնախոտ-խոտեղեգ, երեսբաց-բացերես, երակազարկ-զարկերակ բառազույգերում բառասկզբի երգ, եզր, եղեգն, երես, երակ արմատներն սկսվում են ե տառով, որ հնչում է յէ: Նույն բաղադրիչները երկրորդ անդամներում երկրորդ դիրքում են. բառասկզբի ե-ն հայտնվել է բառամիջում ու հնչում է է: Այստեղ յ բաղաձայնը վերանում է և մնում միայն առաջին անդամում՝ դառնալով արտասանական տարբերության պատճառ կամ պատճառներից մեկը: Բերենք նշված բառերի արտասանական տարբերության պատկերը՝ միայն քննվող հարցի առումով. յերգասիրություն-սիրերգություն, յեզրապատ-պատեզր, յեղեգնախոտ-խոտեղեգ, յերեսբաց-բացերես, յերակազարկ-զարկերակ: Ներկա տարբերության փոխաստեղծությունները պետք է փնտրել բառարաններում ե տառով սկսվող բառերի շարքում: Հմմտ. նաև. երախաբաց-բացերախ, եզրառու-առվեզր, երգ-պար և պարերգ, եղնայծ-այծեղն, երեսպնդություն-պնդերեսություն, երգաշար-շարերգ, եղեգնաշարաբար-շարաբեղեգ:

Ու տառով սկսվող բաղադրիչների դեպքում բառասկզբում հնչում է վօ. վերջինս դրափոխությունից հետո, հայտնվելով բառամիջում՝ հնչում է օ: Երկու անդամների տարահնչյունության պատճառը կամ պատճառներից մեկը դառնում է վ բաղաձայնը: Առաջ է գալիս արտասանական տարբերության այսպիսի պատկեր. վօլոռնաձաղիկ-ձաղիլօլոռն, վօսկեզարդ-զարդօսկի, վօսկեձույլ - ձույլօսկի, վօսկրապինդ - պնդօսկր, վօտնաթեթն - թեթնօտն: Այս պատճառով առաջ եկած տարահնչյուն փոխաստեղծություններն էլ բառարաններում պետք է փնտրել ու տառով սկսվող բառերի շարքում: Հմմտ. նաև. ոսկեթերթ-թերթօսկի, ոսկրազուլի-զլիոսկր, ոտնծուռ-ծուռոտն, որսագողություն-գողորսություն, որսաշուն-շնորս:

Այլ է ը ձայնավորի պարագան: Բառազույգերում արտասանական տարբերությունն ի հայտ է գալիս այն անդամներում, որտեղ ը-ն հնչում է բառավերջի գաղտնավանկում՝ աղմկախառն, ժպտադառն, առատաձեռն, այծեզրն, գեղանձըն: Մյուս անդամում դրափոխված լինելով՝ այսպիսի բաղադրիչի արտասանությունն ուրիշ է լինում. գաղտնավանկի մի բաղաձայնը վանկ է կազմում նախորդող, իսկ մյուսը՝ հաջորդող ա հոդակապի կամ այլ հնչյունների հետ. խառ-նաղմուկ, դառ-նաժպիտ, ձեռ-նատատ, եզ-նայծ, անձ-նագեղ: Գաղտնավանկ ը-ն այստեղ վերանում է: Այս դեպքը վերաբերում է բառավերջում արմատական և բաղաձայնը պահպանած բառերին, որոնք այս իմաստով պատմական հնչյունափոխության չեն ենթարկվել: Հմմտ. նաև. խնկեղեգն-եղեգնախունկ, ունայնաձեռն-ձեռնունայն, արմատախառն-խառնարմատ, ծաղկոլոռն-ոլոռնաձաղիկ, թեթնտոն-տոնաթեթն: Անշուշտ, ը ձայնավորի հետ կապված արտասանական տարբերության հանդիպում ենք անհամեմատ մեծ թվով այն բառերում, որտեղ, ի, ու ձայնավորները հնչյունափոխվելով, ինչպես նշել ենք վերը, վերածվել են ը-ի՝ բացսիրտ-սրբտաբաց, դմաշիշ-շշադդում, ցուցանիշ-նրշացույց: Կամ. առատագութ-գթառատ, գագփուշ-փշագագ, շարքաբուծ-լծաշարք, կարմրաթախ-թխակարմիր:

Այսպիսով, փոխատեղությունների բառագույգերում անդամների տարահնչյունության պատճառները երեքն են՝ հնչյունափոխությունը, և հոդակապով կազմված լինել-չլինելը, արտասանական զանազանությունները:

Մինչև այս՝ առանձին-առանձին ուշադրություն դարձվեց այն բառախմբերի վրա, որոնցում երևան էր գալիս նշված պատճառներից մեկնումեկը: Բայց այսպես լինում է փոխատեղությունների մի մասում: Մյուս մասում գործում են միատեղ մեկից ավելի պատճառներ՝ առաջինը երկրորդի կամ երրորդի, երկրորդը՝ երրորդի կամ երեքը միատեղ՝ մի բառագույգում: Վերջնենք առատապտուղ-պտղառատ, արկածասեր-սիրարկած գույգերը: Նկատելի է, որ անդամներում կա հնչյունափոխություն և և հոդակապ ունենալ-չունենալու հանգամանքը: Մինչդեռ առատաձեռն-ձեռնառատ, երգասիրություն-սիրերգություն գույգերում՝ և հոդակապով լինել-չլինելն ու արտասանական զանազանությունը: Եվ այսպես. Էդեգնաշաքար-շաքարեղեգ գույգում՝ հնչյունափոխություն, և հոդակապ ունենալ-չունենալը և արտասանական զանազանությունը: Նույնն է երգասեր-սիրերգ գույգում:

Երևույթի ուսումնասիրությունը ցույց է տալիս, որ գույգ կազմող անդամները միմյանցից հնչյունապես կարող են տարբերվել մեկ կամ մի քանի հնչյուններով: Արդ, հետաքրքիր է իմանալ, թե որքանի կարող է հասնել այդ տարբերությունը և թե, ընդհանրապես, հնչյունական քանակային տարբերությունների ինչ դեպքեր կան: Նախ ասենք, որ բառագույգի ներսում տարբերիչ հնչյունները կարող են բաշխված լինել այլնայլ կերպ: Որոշ դեպքերում դրանց թիվն անդամներում հավասար է, ուրիշներում՝ անհավասար, երրորդներում տարբերիչ հնչյունները միայն մեկ անդամում են, այդ իմաստով մյուսը չեզոք է:

Այժմ դառնանք քանակային կոնկրետ տարբերություններին:

ա. Մեկ հնչյուն: Ամենից փոքրաթիվ տարբերիչն է: Դա կարելի է նկատել, օրինակ, հետևյալ փոխատեղություններում. աղացաքար-քարաղաց, բեռնաձի-ձիաբեռ, գորշադեղին-դեղնագորշ, խոտաբույժ-բուժախոտ, խաղազույգ-զուգախաղ: Առաջին գույգում միակ տարբերիչն է՝ ա, երկրորդում՝ ն, երրորդում՝ ի, վերջին երկուսում՝ յ հնչյունները:

բ. Երկու հնչյուն. անվափուկ-փուկանիվ, գայլաշուն-շունագայլ, թթվակաղամբ-կաղամբաթթու, ուղեփակ-փակուղի, գիտափորձ-փորձագետ: Տարբերիչներն են. առաջին գույգում ա, ի, երկրորդում՝ ու, ը, երրորդում՝ վ, ու, չորրորդում ու հինգերորդում՝ է, ի հնչյունները:

գ. Երեք հնչյուն. ապակեձուլ-ձուլապակի, առատագութ-գրթառատ, դեղնակապույտ-կապտադեղին, թթվակաթ-կաթնաթթու, դեղափոշի-փոշեդեղ: Տարբերիչներն են. առաջին գույգում է, յ, ի, երկրորդում՝ ա, ու, ը, երրորդում ու, յ, ի, չորրորդում՝ վ, ն, ու և հինգերորդում՝ ա, ի, է:

դ. Չորս հնչյուն: Այսպիսի տարբերությամբ նույնաբաղադրիչ փոխատեղությունները նկատելիորեն պակաս են հանդիպում: Դրանցից են. անվանափոխություն-փոխանունություն, բացդուռ-դռնբաց, վոսկեձուլ-ձուլուկ, բաժնեմաս-մասնաբաժն: Տարբերիչներն են. առաջին գույգում վ, ա (երկու), ու, երկրորդում՝ ու, ը (երկու), ն, երրորդում՝ վ, է, յ, ի, չորրորդում՝ է, ն, ա, ի հնչյունները:

ե. Հինգ հնչյուն: Մա տարբերիչների առավել մեծ թիվն է: Հնչյունակազմական այսպիսի տարբերությամբ նույնաբաղադրիչ փոխաստեղծություններն իրենց հերթին ավելի պակաս են, քան չորս հնչյունով տարբերվողները: Սրանցից են. անվանակնիք-կնքանուն, կիտաբաժին-բաժնեկես, յերգչախումբ-խումբերգիչ: Տարբերիչներն են. առաջին զույգում վ, ա (երկու), ի, ու, երկրորդում՝ ի (երկու), ա, է (երկու), երրորդում՝ յ, ա, ու, ը, ի:

Նկատենք, որ ի տարբերություն հնչյունաբանության հետ առնչվող դրափոխության լեզվական երևույթի, որտեղ հետևաառաջում են մեկ-երկու հնչյուններ՝ առանց անդրադառնալու բառիմաստի վրա, ներկա՝ բառագիտականի դեպքում, դրափոխվում են ամբողջական արմատներ, ըստ որում, հաճախ ածանցների հետ ու հետևաառաջում են երկուսից տասը և կամ ավելի հնչյուններ՝ հանգեցնելով ոչ միայն արտասանական, այլև նոր բառերի կազմության, իսկ փոխաստեղծությունների մի մասում՝ նաև բառիմաստային փոփոխությունների:

II. ՆՈՒՅՆԱՀՆՅՈՒՆ ՆՈՒՅՆԱԲԱՂԱԴՐԻՉ ՓՈՒՍՏԵՂՈՒՅԹՆԵՐ

Ինչպես նշեցինք, այս կարգի փոխաստեղծությունները բաղկացած են բացառապես միևնույն հնչյուններից: Մա նշանակում է, որ անկախ բաղադրիչների դրափոխությունից՝ բառասկզբում, բառամիջում կամ բառավերջում լինելուց, հնչյունափոխության, հոդակապի, արտասանության հետ կապված փոփոխությունները այստեղ չեն գործում: Դիտարկենք նշված տարբերություններին հանգեցնող պատճառների բացակայության հանգամանքներն առանձին-առանձին:

Ամենից առաջ նշենք, որ կան բառաբարդման երկու եղանակով կազմվող բառերի տեսակներ, որոնցում հնչյունափոխություն իսպառ տեղի չի ունենում: Նախ՝ դրանք զուգադրական հարադրություններ են: Բաղադրիչները սրանցում համագոր են, թվարկման բնույթ ունեն, իսկ գրության մեջ կապակցվում են գծիկով: Անկախ առաջին կամ երկրորդ դիրքում լինելուց, իմաստային, արտասանական, հատկապես շեշտադրական տարբերություններ չեն առաջանում: Այդ պատճառով էլ աղբյուր-հուշարձան, գիշեր-ցերեկ, գրիչ-թանաք, դաստիարակչական-ուսուցողական, առնել-տալ, բարձրանալ-իջնել, հարգել-պատվել, և համապատասխան փոխաստեղծական՝ հուշարձան-աղբյուր, ցերեկ-գիշեր, թանաք-գրիչ, ուսուցողական-դաստիարակչական, տալ-առնել, իջնել-բարձրանալ, պատվել-հարգել անդամները նույնահնչյուն են: Նույնպիսիք են նաև. դիտլ-զուռնա և զուռնա-դիտլ, կանաչ-կարմիր և կարմիր-կանաչ, շատ-քիչ և քիչ-շատ, տուն-տեղ և տեղ-տուն, ուռած-փքված և փքված-ուռած, հարգել-սիրել և սիրել-հարգել ու նման ուրիշ շատ զույգերում:

Հաջորդը բաղիյունական բարդություններն են՝ համադրական թե վերլուծական: Բաղադրիչներն անդամներում դարձյալ համագոր են, թվարկման բնույթի, իսկ զուգադրականների կապակցող գծիկին այստեղ թե՛ գրության, թե՛ արտասանության մեջ փոխարինում են և, ու շաղկապները: Կցականներից են. առևտուր-տուրևառ, դեմնթեր-թերևդեմ, կռիվովեճ-վեճուկռիվ, դարդուցավ-ցավուդարդ, դուրսուներս-ներսուդուրս, վերուվար-վարուվեր, մեծուփոքր-փոք-

րումեծ, ձեռուտ-ստուձեռ: Վերլուծականներից են. ծառ ու ծաղիկ- ծաղիկ ու ծառ, ձեր ու մանուկ-մանուկ ու ձեր, հետ ու առաջ-առաջ ու հետ, բառ ու բան-բան ու բառ, ջուր ու ցեխ-ցեխ ու ջուր, դաշտ ու սար-սար ու դաշտ փոխատեղական գույգերը:

Մակայն նույնահնչյուն նույնաբաղադրիչ փոխատեղությունների մեջ մտնում են անհամեմատ մեծ թվով իսկական բարդություններ: Դրանցում բաղադրիչները համագոր չեն, այլ ներքին շարահյուսական զանազան հարաբերությունների մեջ են, ինչպես ցույց է տալիս բառիմաստային քննությունը: Նույնահնչյունություն պատճառն այժմ ձայնավորների մեջ է, որոնք, եթե առանձին դեպքերը հաշվի չառնենք, հնչյունափոխության չեն ենթարկվում: Դրանք են՝ ա, է (գրաբար-յան է), օ (գրությամբ նան՝ ո): Նույնը պետք է ասել յու երկհնչյունի վերաբերյալ: Ասվածը ցույց տանք օրինակներով: Ա ձայնավորով բառագույգեր. գարդաքանդակ-քանդակագարդ, մայրաքաղաք-քաղաքամայր, լանջաբաց-բացալանջ, տախտակախաղ-խաղատախտակ, ցանցավանդակ-վանդակացանց: Խառն ձայնավորներով բառագույգեր. բերդաքաղաք-քաղաքաբերդ, գորշաճերմակ-ճերմակագորշ, գորովաջերմ-ջերմագորով, թևալող-լողաթև, թերթապողպատ-պողպատաթերթ, խոտակեր-կերախոտ, մոլորաքայլ-քայլամոլոր, զարդապատկեր-պատկերազարդ:

Յու երկհնչյունով բառագույգեր. գյուղաքաղաք-քաղաքագյուղ, կաթնայուղատու-յուղակաթնատու, ձյունաճերմակ-ճերմակաձյուն, պսակահյուս-հյուսապսակ, պունակամար-կամարապուն, պունաշար-շարապուն:

Գաղտնավանկ ը-ն հնչյուն է բառագույգի երկու անդամներում էլ՝ պահպանելով իր գործառույթը, և արտասանական տարբերությունների պատճառ չի դառնում, ինչպես տարահնչյուն, արտասանությամբ տարբեր փոխատեղությունների ժամանակ: Օրինակ. բնակատեղ-տեղաբնակ, գնդակախաղ-խաղագնդակ, խոովամտություն-մտախոովություն, պսակագեղ-գեղապսակ, նմուշափորձ-փորձանմուշ:

Տարահնչյուն նույնաբաղադրիչ փոխատեղությունների մասին խոսելիս մենք նշեցինք, որ բառակզբում ու, ի ձայնավորները, շեշտակիր չլինելով, հնչյունափոխվում են: Բայց այս կանոնը բացարձակ չէ: Մույն փոխատեղություններում հանդիպում են բառեր, որոնք սկզբում ունեն հենց նշված ձայնավորները: Վերջիններս հնչյուն են նաև գույգ կազմող անդամում՝ բառամիջում կամ բառավերջում: Այսպիսի բառերը կամ գրքային են, բանաստեղծական, կամ տերմիններ, թեև կան նաև առօրյա բառեր, որոնք խոսակցականում ու բարբառներում ունեն իրենց հնչյունափոխական տարբերակները: Նախ բերենք ի ձայնավորով օրինակներ. նիզականետ-նետանիզակ, ծիծաղագեղ-գեղածիծաղ, գիշերահավասար-հավասարագիշեր, սպիտակագորշ-գորշասպիտակ, թիթեղածածկ-ծածկաթիթեղ, տիկնիկախաղ-խաղատիկնիկ, քիթկախ-կախքիթ: Այս շարքին են պատկանում նաև այն բառերը, որոնք կազմված են թի, ձի, լի արմատներով, քանի որ ի-ն, բաց վանկում, չի հնչյունափոխվում՝ թիանավ-նավաթի, ձիաքարշ-քարշաձի, լիահյութ-հյութալի:

Պետք է նկատել, որ սկզբնավանկում ի կարող է լինել նաև՝ իբրև հետևանք է ձայնավորի հնչյունափոխության: Ինչպես. գիսակագեղ-գեղագիսակ, դիմակա-

խաղ-խաղաղիմակ, վիճաբանել-բանավիճել, թիկնոցավրան («թէկն» արմատից)-վրանաթիկնոց:

Առաջին դիրքի բաղադրիչում հանդես եկող ու ձայնավորի օրինակներ են. փուշգագ-գագփուշ, գլուխկախ-կախգլուխ, խութաժայռ-ժայռախութ, խութբերան-բերանխութ, սուսերամարտ-մարտասուսեր, նմուշափորձ-փորձանմուշ: Ուղտայծ-այծուղտ, ուղևորաբեռնատար-բեռնաուղևորատար բառազույգերի առաջին անդամներն ուղղակի սկսվում են ու-ով, որն էլ պահպանվում է բառամիջում:

Ն բաղաձայնը նույնահնչյուն փոխաստեղծությունում ևս կարող է չենթարկվել պատմական հնչյունափոխության և համապատասխան արմատի կազմում լինել բառազույգի երկու անդամներում էլ: Այդ երևաց մի քանի տարահնչյուն փոխաստեղծություններում, որոնցում՝ն-ով ավարտվող արմատը հանդես գալով բառավերջում, նույնահնչյունության չէր հանգեցնում, քանի որ կային հնչյունակազմի տարբերության այլ պատճառներ: Ներկա դեպքում՝ն-ով ավարտվող արմատը անդամներից մեկում հանդես է գալիս բառամիջում, քանի որ հաջորդում են ածանցներ կամ այլ արմատներ: Որպես այս հանգամանքի հետևանք՝ ն բաղաձայնը չի ընկնում՝ հանգեցնելով նույնահնչյունության, որովհետև հնչյունակազմական այլ տարբերություններ չկան: Օրինակներ. բեռնամբարձիչ-ամբարձարբեռնիչ, բեռնաուղևորատար-ուղևորաբեռնատար, կաթնաթթվային-թթվակաթնային, կաթնամսատու-մսակաթնատու, լեռնահովտային-հովտալեռնային:

Մինչև հիմա անդրադառնում էինք այն նույնահնչյուն փոխաստեղծություններին, որոնք առաջանում էին հնչյունափոխության բացակայության պատճառով: Այժմ կանգ առնենք այնպիսիների վրա, որոնց երկու անդամներում էլ առկա է հնչյունափոխությունը: Եթե տարահնչյուն փոխաստեղծություններում հնչյունափոխված արմատն առաջին դիրքում էր, իսկ անհնչյունափոխը՝ երկրորդ, ավարտելով բառը, ապա այժմ երկու դիրքում էլ արմատները հնչյունափոխված են: Եվ սա դարձյալ իբրև հետևանք այն քանի, որ ավելանում է ուրիշ արմատ կամ ածանց: Շեշտը տեղափոխվում է բառավերջ՝ հանգեցնելով հնչյունափոխության, և արմատները նույն կերպ հանդես են գալիս երկու անդամում էլ՝ առաջ բերելով նույնահնչյունություն: Այսպես. դեղնակապույտ-կապտադեղին բառազույգը տարահնչյուն է, սակայն ավուն ածանցն ավելացնելուց հետո ունենում ենք նույնահնչյունություն՝ դեղնակապտավուն-կապտադեղնավուն: Գեղանկարիչ-նկարչագեղ տարահնչյուն գույգին ություն ածանցն ավելացնելուց հետո ունենում ենք՝ գեղանկարչություն-նկարչագեղություն նույնահնչյունը. ի ձայնավորը սղվում է երկու անդամում էլ: Նույն կերպ. կաթնաթթու-թթվակաթ (տարահնչյուն), բայց կաթնաթթվային և թթվակաթնային (նույնահնչյուն). երկու անդամում էլ առկա են ն, վ բաղաձայնները: Ահա այս ճանապարհով առաջ եկած ևս մի քանի նույնահնչյուն փոխաստեղծություններ. բանասիրական-սիրաբանական, բանասիրություն-սիրաբանություն, բանավիճել-վիճաբանել, դարչնակարմրագույն-կարմրադարչնագույն, կապտականաչավուն-կանաչակապտավուն:

Վերջապես, հնչյունափոխության հետևանքով նույնահնչյուն նույնաբաղադրիչ փոխաստեղծությունների առաջացման մի եղանակ ևս: Այս դեպքում անդամները բաղկացած են գուտ երկուական արմատից, և բառերը երկարացնելու անհրա-

Ժեշտությունը չկա: Դրանք երկուստեք ենթարկվում են միննույն հնչյունափոխությանը: Երբ բույժ և բույս արմատները բառաբարդվում են, ույ երկհնչյունը առաջին դիրքի արմատում հնչյունափոխվում է՝ բուժաբույս, իսկ դրափոխությունից հետո, բույս արմատն է հնչյունափոխվում՝ բուսաբույժ: Այս փոխաստեղականներն իրենց ամբողջության մեջ նույնահնչյուն են: Կամ. երկու բաղադրիչների դրափոխությունից հետո, ի ձայնավորի հնչյունափոխությամբ առաջ են գալիս գծագիր-գրագիծ, գրանիշ-նշագիր, ժպտաթախիծ-թախձաժպիտ, պնդաջիլ-ջլապինդ, պնդասրտություն-սրտապնդություն նույնահնչյուն փոխաստեղականները: Ներկայացվող եղանակով առաջացող նույնահնչյուն փոխաստեղությունները մեծաթիվ չեն:

Այժմ անցնենք հոդակապի դերակատարությանը: Վերը տեսանք, որ բառագույգի անդամներից մեկում հոդակապ լինել-չլինելը հանգեցնում է տարահնչյունության: Նույնահնչյունության դեպքում երկու անդամներում էլ կամ պետք է լինի հոդակապ, կամ չպետք է լինի: Նախ բերենք և հոդակապով փոխաստեղականների օրինակներ. բառավանկային-վանկաբառային, զարդածառ-ծառազարդ, լսատեսողական-տեսալսողական, մայրաքաղաք-քաղաքամայր, հեռուստառադիոթեր-ռադիոհեռուստաթեր, ռադիոհեռուստահաղորդում-հեռուստառադիոհաղորդում, հոդաքարային-քարահոդային, հոդասակավություն-սակավահոդություն: Ուշադրություն դարձնենք հետևյալ գույգերի հետ կապված մի հանգամանքի վրա. իրանագեղ-գեղաիրան, լողաթն-թնալող, գլխաբաց-բացազուխ գույգերի երկրորդ անդամներն ունեն իրենց անհոդակապ բառային տարբերակները՝ գեղիրան, թնալող, բացզուխ: Ուրեմն նշված առաջին անդամները, որ հոդակապով են և նույնահնչյուն են իրենց փոխաստեղությամբ մի բառային տարբերակի հետ, իսկ մյուսի հետ՝ տարահնչյուն են:

Այժմ բերենք անհոդակապ բառագույգերի օրինակներ. այծուղտ-ուղտայծ, նեղսրտել-սրտնեղել, փակբերան-բերանփակ, քիթկախ-կախքիթ, կախզուխ-զուխկախ, խոտավել-ավելխոտ: Անհոդակապ անդամներն էլ կարող են ունենալ իրենց հոդակապով տարահնչյուն տարբերակները, ինչպես՝ գազփուշ-փուշգազ (փշագազ), բացթն-թնբաց (թնաբաց), սրտնեղություն-նեղսրտություն (նեղասրտություն), սուրսայր-սայրսուր (սայրասուր):

Նույնահնչյուն նույնաբաղադրիչ փոխաստեղությունները ունենում են միննույն հնչյունական կազմը: Այդուհանդերձ, դրանք նույնահնչյուն են, բայց ոչ նույնահունչ, քանի որ բաղադրիչների հետևառաջությունից հետո փոխվում է նաև հնչյունների արտասանության հերթականությունը:

Այսպիսով, նույնաբաղադրիչ փոխաստեղությունների հնչյունական քննությունը վեր է հանում տարահնչյուն և նույնահնչյուն ոչ նույնահունչ բառագույգերի մի հետաքրքրական շարք:

РАЗБОР ФОНЕТИЧЕСКОГО СОСТАВА СЛОВ С ПЕРЕСТАНОВОЧНЫМИ
ИДЕНТИЧНЫМИ КОМПОНЕНТАМИ

ՍՍԱՆՆԱ ԴԵՎՈՐԿՅԱՆ

Р е з ю м е

Вследствие перестановки своих компонентов – корней и суффиксов, перестановочные слова подвергаются фонетическим изменениям и по этому признаку делятся на две большие группы: с различными звуковыми составами и с одинаковыми звуковыми составами. Члены лексических пар с разными звуковыми составами могут отличаться друг от друга звуками от 1 до 5. Члены лексических пар с одинаковыми звуковыми составами состоят исключительно из одних и тех же звуков. Меняется только очередность их произношения.

INQUIRY INTO THE PHONETIC COMPOSITION OF WORDS WITH TRANSPOSITIONAL
IDENTICAL COMPONENTS

SUSANNA GEVORGYAN

S u m m a r y

As a result of transposition of their components - roots and suffixes Armenian transpositional words undergo certain phonetic changes and are therefore divided to two large groups: words with diverse phonetic structure and words with the same phonetic structure. Members of the lexical pairs with diverse or changed phonetic structure may differ from each other by sounds from 1 to 5. Members of lexical pairs with the similar phonetic structure are composed exclusively of the same phonemes but the order of their pronunciation is different.